

四庫全書

集部

欽定四庫全書

集部

西晉文紀卷七

詳校官庶吉士_臣初喬齡

主事銜_臣徐以坤覆勘

覆校官博士_臣劉光第

校對官中書_臣范 鏊

謄錄監生_臣孫鵬年

欽定四庫全書

西晉文紀卷七

明 梅鼎祚 編

西晉七

杜預

字元凱京兆杜陵人魏幽州刺史
起子歷鎮襄太將軍封當陽侯

律令注解奏

預與賈充等定律
令既成爲之注解

法者蓋繩墨之斷例非窮理盡性之書也故文約而例
直聽省而禁簡例直則易見禁簡則難犯易見則人知
所避難犯則幾於刑厝刑之本在於簡直故必審名分

審名分者必忍小理古之刑書銘之鐘鼎鑄之金石所以遠塞異端絕異理也法出一門然後人知恒禁吏無淫巧政明於上民安於下今所注皆網羅法意格之以名分使用之者執名例以審趣舍伸繩墨之直去析薪之理也

又律序云律者以正罪名令者以序事制二者相須為用也又奏事云被勅以臣造新律事律吏杜

景李復等造律皆未清本末之意者也

黜陟課法畧

臣聞上古之政因循自然虛已委誠而信順之道應神

感心通而天下之理得逮至淳樸漸散彰美顯惡設官分職以頒爵祿弘宣六典以詳考察然猶倚明哲之輔建忠貞之司使名不得越功而獨美功不得後名而獨隱皆疇咨博詢敷納以言及至末世不能紀遠而求於密微疑諸心而信耳目疑耳目而信簡書簡書愈繁官方愈僞法令滋章巧飾彌多昔漢之刺史亦歲終奏事不制算課而清濁羸舉魏氏考課即京房之遺意其文可謂至密然由於累細以違其體故歷代不能通也豈

若申唐堯之舊去密就簡則簡而易從也夫宣盡物理神而明之存乎其人去人而任法則以傷理今科舉優劣莫若委任遠官各考所統在官一年以後每歲言優者一人為上第劣者一人為下第因計偕以名聞如此六載王者總集採按其六歲處優舉者超用之六歲處劣舉者奏免之其優多劣少者敘用之劣多優少者左遷之今考課之品所對不鈞誠有難易若以難取優以易而否王者固當準量輕重微加降殺不足復曲以法

盡也已丑詔書以考課難成聽通薦例薦例之理即亦
取於風聲六年頗薦黜陟無漸又非古者三考之意也
今每歲一考則積優以成陟累劣以取黜以士君子之
心相處未有官故六年六黜清能六進否劣者也監司
將亦隨而彈之若令上下公相容過此為清議大類亦
無取於黜陟也

陳伐吳至計表

預拜鎮南大將軍都督荊州精
繕兵甲啓請伐吳武帝報付明

年大舉預表陳旬月之中又上表時帝與中
書令張華圍碁預表適至華推枰斂手謂可

不勞而定帝乃許之以太康元年進兵累剋城邑皆如預策

自閏月以來賊但勅嚴下無兵上以理勢推之賊之窮計力不兩完必先認上流勤保夏口以東以延視息無緣多兵西上空其國都而陛下過聽使用委棄大計縱敵患生此誠國之遠圖使舉而有敗勿舉可也事為之制務從完牢若或有成則開太平之基不成不過費損日月之間何惜而不一試之若當須後年天時人事不得如常臣恐其更難也陛下宿議分命臣等隨界分進

其所禁持東西同符萬安之舉未有傾敗之慮臣心實
了不敢以曖昧之見自取後累惟陛下察之

萬一作平

又上表

羊祜與朝臣多不同不先博畫而密與陛下共施此計
故益令多異凡事當以利害相較今此舉十有八九利
其一二止於無功耳其言破敗之形亦不可得直是計
不出已功不在身各恥其前言故守之也自頃朝廷事
無大小異意鋒起雖人心不同亦由恃恩不慮後難故

輕相同異也昔漢宣帝議趙充國所上事效之後詰責諸議者皆叩頭而謝以塞異端也自秋以來討賊之形頗露若今中止孫皓怖而生計或徙都武昌更完修江南諸城遠其居人城不可攻野無所掠積大船於夏口則明年之計或無所及

並晉書

舉賢良方正表

案蘇贊布行於草野著德於閭閻放心直意若得珥筆丹墀推訪格言必有諤諤匪躬之節

初學記 又舉賢良方正表若得言

論端委太學錯總藝文垂纓玉陛論道紫宮誠帝宮之
瑰寶清廟之偉器此失名耳 又表長史劉僧修治洛
陽以東運渠通
舟嘗用赤馬

皇太子釋服議

秦始皇中武元楊皇后崩及將遷
於峻陽陵依舊制既葬帝及羣

臣除喪先尚書祠部奏從博士張靖議皇太子亦從制俱釋服博士陳達議為今制所施
蓋漢文權制興於有事非禮之正皇太子無
有國事自宜終服詔更詳議尚書杜預議尚
書僕射盧欽尚書魏舒問預證據所依預答
欽舒從之遂命預造議奏聞於是太子除衰
麻諒闇終制或謂其違禮合時吳王友摯虞
與預書預使博士段暢博采典籍著明大義

古者天子諸侯三年之喪始同齊斬既葬除喪服諒闇

以居心喪終制不與士庶同禮漢氏承秦天下為天子終服三年漢文帝見其下不可久行而不知古制更以意制祥禫除喪即古魏氏直以訖葬為節嗣君皆不復諒闇終制學者非之久矣然竟不推究經傳考其行事專謂王者三年之喪當以縗麻終二十五月嗣君苟若此則天下羣臣皆不得除喪雖志在居薦更逼而不行至今世主皆從漢文輕典由處制者非制也今皇太子與尊同體宜復古典卒哭除衰麻以諒闇終制於義既

不應不除又無取於漢文乃所以篤喪禮也

畲盧欽魏舒問

傳稱三年之喪自天子達此謂天子絕碁唯有三年喪也非謂居喪衰服三年與士庶同也故後世子之喪而叔嚮稱有三年之喪二也周公不言高宗服喪三年而云諒闇三年此釋服心喪之文也叔嚮不譏景王除喪而譏其燕樂已早明既葬應除而違諒闇之節也春秋晉侯享諸侯子產相鄭伯時簡公未葬請免喪以聽命

君子謂之得禮宰咺來歸惠公仲子之賵傳曰弔生不及哀此皆既葬除服諒闇之證先儒舊說往往亦見學者未之思耳喪服諸侯為天子亦斬衰豈可謂終服三年邪上考七代未知王者君臣上下衰麻三年者諸下推將來恐百世之主其禮一也非必不能乃事勢不得不故知聖人不虛設不行之制仲尼曰禮所損益雖百世可知此之謂也

皇太子諒闇終制奏

侍中尚書令司空魯公臣賈充侍中尚書僕射奉車都尉大梁侯臣盧欽尚書新沓伯臣山濤尚書奉車都尉平春侯臣胡威尚書劇陽子臣魏舒尚書堂陽子臣石鑒尚書豐樂亭侯臣杜預稽首言禮官叅議博士張靖等議以為孝文權制三十六日之服以日易月道有污隆禮不得全皇太子亦宜割情除服博士陳達等議以為三年之喪人子所以自盡故聖人制禮自上達下是以今制將吏諸遭父母喪皆假寧二十五日敦崇孝道

所以風化天下皇太子至孝著於內而衰服除於外非禮所謂稱情者也宜其不除臣欽臣舒臣預謹案靖遠等議各見所學之一端未統帝者居喪古今之通禮也自上及下尊卑貴賤物有其宜故禮有以多為貴者有以少為貴者有以高為貴者有以下為貴者唯其稱也不然則本末不經行之不遠天子之與羣臣雖哀樂之情若一而所居之宜實異故禮不得同易曰上古之世喪期無數虞書稱三載四海遏密八音其後無文至周

公旦乃稱殷之高宗諒闇三年不言其傳曰諒信也闇
默也下逮五百餘歲而子張疑之以問仲尼仲尼答云
何必高宗古之人皆然君薨百官總已以聽於冢宰三
年周景王有后世子之喪既葬除喪而樂晉叔嚮譏之
曰三年之喪雖貴遂服禮也王雖弗遂宴樂已早亦非
禮也此皆天子喪事見於古文者也稱高宗不云服喪
三年而云諒闇三年此釋服心喪之文也譏景王不譏
其除喪而譏其宴樂已早明既葬應除而違諒闇之節

也堯崩舜諒闇三年故稱遏密八音由此言之天子居喪齊斬之制菲杖經帶當遂其服既葬而除諒闇以終之三年無改父之道故百官總已聽於冢宰喪服已除故稱不言之美明不復寢苦枕土以荒大政也禮記三年之喪自天子達又云父母之喪無貴賤一也又云端衰喪車皆無等此通謂天子居喪衣服之節同於凡人心喪之禮終於三年亦無服喪三年之文然繼體之君猶多荒寧自從廢諒闇之制至今高宗擅名於往代子

張致疑於當時此乃賢聖所以為譏非譏天子不以服
終喪也秦燔書籍率意而行亢上抑下漢祖草創因而
不革乃至率天下皆終重服旦夕哀臨經罹寒暑禁塞
嫁娶飲酒食肉制不稱情是以孝文遺詔斂畢便葬葬
畢紅禪之除雖不合高宗諒闇之義近於古典故傳之
後嗣於時預修陵廟故斂葬得在浹辰之內因以定制
近至明帝存無陵寢五旬乃葬安在三十六日此當時
經學疏略不師前聖之病也魏氏革命以既葬為節合

於古典然不垂心諒闇同譏前代自秦始開元陛下追
尊諒闇之禮慎終居篤允臻古制超絕於殷宗天下歌
德誠非靖等所能原本也天子諸侯之禮當以具矣諸
侯惡其害已而削其籍今其存者唯士喪一篇戴聖之記
雜錯其間亦難以取正天子之位至尊萬機之政至大
羣臣之衆至廣不同之於凡人故大行既葬祔祭於廟
則因疏而除之已不除則羣臣莫敢除故屈已以除之
而諒闇以終制天下之人皆曰我王之仁也屈已以從

宜皆曰我王之孝也既除而心喪我王猶若此之篤也
凡等臣子亦焉得不自勉以崇禮此乃聖制移風易俗
之本高宗所以致雍熙豈惟衰裳而已哉若如難者更
以權制自居疑於屈伸厭降欲以職事為斷則父在為
母菽父卒三年此以至親屈於至尊之義也出母之喪
以至親為屬而長子不得有制體尊之義升降皆從不
敢獨也禮諸子之職掌國子之倅國有事則帥國子而
致之太子唯所用之傳曰君行則守有守則從從曰撫

軍守曰監國不無事矣喪服母為長子妻為夫妾為主母
皆三年之內宮之主可謂無事揆度漢制孝文之喪紅
禪既畢孝景即吉於未央薄后竇后必不得齊斬於別
宮此可知也況皇太子配貳之至尊與國為體故宜遠
尊古禮近同時制屈除以寬諸下協一代之成典君子
之於禮有直而行曲而殺有經而等有順而去之存諸
內而已禮云非玉帛之謂喪云唯衰麻之謂乎此既臣
等所謂經制大義且即實近言亦有不安全皇太子至

孝蒸蒸發於自然號咷之慕匍匐殯宮大行既真往而不反必想像平故彷徨寢殿若不變從諒闇則東宮臣僕義不釋服此為永福官屬當獨衰麻從事出入殿省亦難以繼今將吏雖蒙同二十五月之事寧至於大臣亦奪其制昔翟方進自以身為漢相居喪三十六日不敢踰國典而況於皇太子臣等以為皇太子宜如前奏

除服諒闇終制

並晉書

摯虞答杜預論皇太子除服書

僕以為除服誠合事宜附古則意有未安五服之制成於周室周室以前仰迄上古雖有在喪之哀未有行喪之制故堯稱遏密殷曰諒闇各舉其事而言非未葬降除之名也禮有定制孝景之即古方進之從時皆未足為准蓋聖人之於禮譏其失而通其變今皇太子未就東宮猶在殿省之內故不得伸其哀情以宜奪制何必附之於古欽以舊義哉

杜氏
通典

同前

唐稱遏密殷云諒闇各舉事以為名非既葬有殊降周
室以來謂之喪服喪服者以服表喪今帝者一日萬機
太子監撫之重以宜奪禮葬訖除服變制通理垂典將
來何必附之於古使老儒致爭哉

論水利疏

預為度支尚書咸寧四年秋霖雨上
疏多陳農要朝廷從之平吳後有司

又奏因制
戶調之式

臣輒思惟今者水蓄東南特劇非但五稼不收居業并
損下田所在停汚高地皆多磽墾此即百姓困窮方在

來年雖詔書切告長吏二千石為之設計而不靡開大
制定其趣舍之宜恐徒文具所益蓋薄當今秋夏蔬食
之時而百姓已有不贍前至冬春野無青草則必指仰
官穀以為生命此乃一方之大事不可不豫為思慮者
也臣愚謂既以水為困當恃魚菜螺蚌而洪波泛濫貧
弱者終不能得今者宜大壞兗豫州東界諸陂隨其所
歸而宣導之交令饑者盡得水產之饒百姓不出境界
之內旦暮野食此目下日給之益也水去之後填淤之

田畝收數鍾至春大種五穀五穀必豐此又明年之益也臣前啓典牧種牛不供耕駕至於老不穿鼻者無益於用而徒有吏士穀草之費歲送任駕者甚少尚復不調習宜大出賣以易穀及為賞直詔曰孳育之物不宜減散事遂停寢問王者今典虞右典牧種產牛大小相通有四萬五千餘頭苟不益世用頭數雖多其費日廣古者匹馬邱牛居則以耕出則以戰非如豬羊類也今徒養宜用之牛終為無用之費甚失事宜東南以水田

為業人無牛犢今既壞陂可分種牛三萬五千頭以付
二州將吏士庶使及春耕穀登之後頭責三百斛是為
化無用之費得運水次成穀七百萬斛此又數年後之
益也加以百姓降邱宅土將來公私之饒乃不可計其
所留好種萬頭可即令右典牧都尉官屬養之人多畜
少可並佃牧地明其考課此又三魏近甸歲當復入數
千萬斛穀牛又皆當調習動可駕用皆今日之可全者
也

又疏

諸欲脩水田者皆以火耕水耨為便非不爾也然此事
施於新田草萊與百姓居相絕離者耳往者東南草創
人稀故得火田之利自頃戶口日增而陂竭歲決良田
變生蒲葦人居沮澤之際水陸失宜放牧絕種樹木立
枯皆陂之害也陂多則土薄水淺潦不下潤故每有水
雨輒復橫流延及陸田言者不思其故因云此土不可
陸種臣計漢之戶口以驗今之陂處皆陸業也其或有

舊陂舊竭則堅完修固非今所謂當為人害者也臣前見尚書胡威啓啓宜壞陂其言懇至臣中者又見宋侯相應遵上便宜求壞泗陂徙運道時下都督度支共處當各據所見不從遵言臣案遵上事運道東詣壽春有舊渠可不由泗陂泗陂在遵地界壞地凡萬三千餘頃傷敗成業遵縣領應佃二千六百口可謂至少而猶患地狹不足肆力此皆水之為害也當所共恤而都督度支方復執異非所見之難直以不同害理也人心所見既

不同利害之情又有異軍家之與郡縣士大夫之與百姓其意莫有同者此皆偏其利以忘其害者也此理之所以未盡而事之所以多患也臣又案豫州界二度支所領佃者州郡大軍雜士凡用水田七千五百餘頃耳計三年之儲不過二萬餘頃以常理言之無為多積無用水況於今者水滂瀉溢大為菑害臣以為與其失當寧瀉之不瀉宜發明詔勅刺史二千石其漢氏舊陂舊竭及山谷私家小陂皆當修繕以積水其諸魏氏以

來所造立及諸因雨決溢蒲葦馬腸陂之類皆決瀝之
長吏二千石躬親勸功諸食力之人並一時附功令比
及水凍得羸枯涸其所修功實之人皆以俾之其舊陂
竭溝渠當有所補塞者皆尋求微跡一如漢時故事豫
為部分列上須冬東南休兵交代各留一月以佐之夫
川瀆有常流地形有定體漢民居人衆多猶以為患
今因其所患而宣寫之跡古事以明近大理顯然可坐
論而得臣不勝愚意竊謂最是今日之實益也

平吳後有司又奏

又制戶
調之式

詔書王公以國為家京城不宜復有田宅今未暇作諸
國邸當使城中有往來處近郊有芻藁之田今可限之
國王公侯京城得有一宅之處近郊田大國田十五頃
次國十頃小國七頃城內無宅城外有者皆聽留之

並
晉

書

秦川軍事

臣嘗聞邊人說虜專以騎為寇穿塹不如作馬塹馬塹

法坑方三尺錯平穿之虜騎非下馬平治則終不得入
又其外蹊要路亦可隨作塢施槍堦中訖薄覆其上如
此則虜當築地而行不敢輒往來也

並太平
御覽

奏事

竊惟籍田令本以籍田千畝十頃之田計其案行周旋
不過數里凡宗廟粢盛御用膳羞及羣神之調於是取
所籍戶口足以當一縣一邑所供至重事貴臨履也

北堂

鈔書

又奏

臣前在南聞魏興西北山有野牛野羊牛之大者二千
斤羊之大者數百斤試令四求今者各得一枚并頭角
蹄按其形不與中土相似然是野獸中所希有

太平御覽又

奏事云藥杵臼澡槃熨斗釜瓮
鉋槃錫銷皆亦民間之急用也

祥裕議

易曰上古之代喪期無數自殷高宗諒闇三年不稱服
喪三年而稱諒闇三年此釋服心喪之謂大戴篇曰昔

武王崩成王十三而嗣立周公居冢宰攝政明年六月
既葬周公冠成王而朝於祖以見諸侯命祝雍作頌是
三年之內時明矣故今禘祀烝嘗於是行焉昔仲尼之
制春秋也因魯史以明王法喪中之祥祿譏貶之文著

焉

杜氏
通典

與王濬書

洛為龍驤將軍統兵伐吳詔書使濬
下建平受杜預節度至秣陵受王渾

節度預至江陵謂諸將帥曰若濬得下建平
則順流長驅不宜令受制於我濬至西陵預

與濬書濬鼓棹徑
造三山吳主皓降

足下既推其西藩便當徑取秣陵討累世之逋寇釋吳人於塗炭自江入淮逾於泗汴沂河而上振旅還都亦

曠世一事也

晉書 秣陵通鑑作建業

與子貺書

預子錫無名貺者

知汝頗欲念學令同還車到副書可案錄受之當別置

一宅中勿復以借人

玉府新書

春秋左氏傳序

預立功後從容無事耽思經籍為春秋左氏經傳集解參考衆

家譜第謂之釋例又作盟會圖春秋長歷備成一家之學比老乃成

春秋者魯史記之名也記事者以事繫日以日繫月以月繫時以時繫年所以紀遠近別同異也故史之所記必表年以首事年有四時故錯舉以為所記之名也周禮有史官掌邦國四方之事達四方之志諸侯亦各有國史大事書之於策小事簡牘而已孟子曰楚謂之檮杌晉謂之乘而魯謂之春秋其實一也韓宣子適魯見易象與魯春秋曰周禮盡在魯矣吾乃今知周公之德與周之所以王也韓子所見蓋周之舊典禮經也周德

既衰官失其守上之人不能使春秋昭明赴告策書諸所記注多違舊章仲尼因魯史策書成文考其真偽而志其典禮上以遵周公之遺制下以明將來之法其教之所存文之所害則刊而正之以示勸戒其餘則皆即用舊史史有文質辭有詳畧不必改也故傳曰其善志又曰非聖人孰能修之蓋周公之志仲尼從而明之左丘明受經於仲尼以為經者不刊之書也故傳或先經以始事或後經以終義或依經以辯理或錯經以合異

隨義而發其例之所重舊史遺文畧不盡舉非聖人所修之要故也身為國史躬覽載籍必廣記而備言之其文緩其旨遠將令學者原始要終尋其枝葉究其所窮優而柔之使自求之饜而飫之使自趨之若江海之浸膏澤之潤渙然水釋怡然理順然後為得也其發凡以言例皆經國之常制周公之垂法史書之舊章仲尼從而修之以成一經之統體其微顯闡幽裁成義類者皆據舊例而發義指行事以正褒貶諸稱書不書先書故

書不言不稱書曰之類皆所以起新舊發大義謂之變
例然亦有史所不書即以為義者此蓋春秋新意故傳
不言凡曲而暢之也其經無義例因行事而言則傳直
言其歸趣而已非例也故發傳之體有三而為例之情
有五一曰微而顯文見於此而義起於彼稱族尊君命
舍族尊夫人梁亡城緣陵之類是也二曰志而晦約言
示制推以知例參會不地與謀曰及之類是也三曰婉
而成章曲從義訓以示大順諸所諱辟壁假許田之類

是也四曰盡而不汚直書其事具文見意丹楹刻桷天王
求車齊侯獻捷之類是也五曰懲惡而勸善求名而亡
欲蓋而章書齊豹盜三叛人名之類是也推此五體以
尋經傳觸類而長之附於二百四十二年行事王道之
正人倫之紀備矣或曰春秋以錯文見義若如所論則
經當有事同文異而無其義也先儒所傳皆不其然答
曰春秋雖以一字為褒貶然皆須數句以成言非如八
卦之爻可錯綜為六十四也固當依傳以為斷古今言

左氏春秋者多矣今其遺文可見者十數家大體轉相
祖述進不成為錯綜經文以盡其變退不守丘明之傳
於丘明之傳有所不通皆沒而不說而更膚引公羊穀
梁適足自亂預今所以為異專修丘明之傳以釋經經
之條貫必出於傳傳之義例總歸諸凡推變例以正褒
貶簡二傳而去異端蓋丘明之志也其有疑錯則備論而
闕之以俟後賢然劉子駿創通太義賈景伯父子許惠
卿皆先儒之美者也末有穎子嚴者雖淺近亦復名家

故特舉劉賈許穎之違以見同異分經之年與傳之年
相附比其義類各隨而解之名曰經傳集解又別集諸
例及地名譜第歷數相與為部凡四十部十五卷皆顯
其異同從而釋之名曰釋例將令學者觀其所聚異同
之說釋例詳之也或曰春秋之作左傳及穀梁無明文
說者以為仲尼自衛反魯修春秋立素王丘明為素臣
言公羊者亦云黜周而王魯危行言孫以辟當時之害
故微其文隱其義公羊經止獲麟而左氏經終孔邱卒

敢問所安答曰異乎余所聞仲尼曰文王既沒文不在
茲乎此制作之本意也歎曰鳳鳥不至河不出圖吾已
矣夫蓋傷時王之政也麟鳳五靈王者之嘉端也今麟
出非其時虛其應而失其歸此聖人所以為感也絕筆
於獲麟之一句者所感而起固所以為終也曰然則春
秋何始於魯隱公答曰周平王東周之始王也隱公讓
國之賢君也考乎其時則相接言乎其位則列國本乎
其始則周公之祚胤也若平王能祈天永命紹開中興

隱公能弘宣祖業光啓王室則西周之美可尋文武之迹不墜是故因其歷數附其行事采周之舊以會成王義垂法將來所書之王即平王也所用之歷即周正也所稱之公即魯隱也安在其黜周而王魯乎子曰如有用我者吾其為東周乎此其義也若夫制作之文所以章往考來情見乎辭言高則旨遠辭約則義微此理之常非隱之也聖人包周身之防既作之後方復隱諱以避患非所聞也子路欲使門人為臣孔子以為欺天而

云仲尼素王丘明素臣又非通論也先儒以為制作三
年文成致麟既已妖妄又引經以至仲尼卒亦又近誣
據公羊經止獲麟而左氏小邾射亦不在三叛之數故
余以為感麟而作作起獲麟則文止於所起為得其實
至於反袂拭面稱吾道窮亦無取焉

義起於彼五臣作起義在彼諱辟善

本作避諱若此五臣作若如有所善作其所公即五臣作公則

春秋長厯論

劉昭後漢書注晉書載畧

書稱暮三百六旬有六日以閏月定四時成歲允釐百

工庶績咸熙是以天子必置日官諸侯必置日御世脩其業以考其術舉全數而言故曰六日其實五日四分之一日日行一度而月日行十三度十九分度之有畸日官當會集此之遲疾以考成晦朔錯綜以設閏月閏月無中氣而北斗邪指兩辰之間所以異於他月也積此以相通四時八節無違乃得成歲其微密至矣得其精微以合天道事敘而不悖故傳曰閏以正時時以作事事以厚生生民之道於是乎在然陰陽之運隨動而

差差而不已遂與厯錯故仲尼丘明每於朔閏發文蓋
矯正得失因以宣明厯數也桓十七年日食得朔而史
闕其日單書朔僖十五年日食而史闕朔與日故傳因
其得失並起時史之謬兼以明其餘日食或厯失其正
也莊二十五年經書六月辛未朔日有食之鼓用牲於
社周之六月夏之四月所謂正陽之月也而時厯誤實
是七月之朔非六月故傳云非常也唯正月之朔慝未
作日有食之於是乎有用幣於社伐鼓於朝此非用幣

伐鼓常月因變而起厯誤也文十五年經文皆同而更復發傳曰非禮明前傳欲以審正陽之月後傳發例欲以明諸侯之禮也此乃聖賢之微旨先儒所未喻也昭十七年夏六月日有食之而平子言非正陽之月以誣一朝近於指鹿為馬故傳曰不君矣且因以明此月為得天正也劉子駿造三統厯以修春秋春秋日食有甲乙者三十四而三統厯唯一食厯術比諸家既最疎又六千餘歲輒益一日凡歲當累日為次而無故益之此

不可行之甚者班固前代名儒而謂之最密非徒班固也自古以來諸論春秋者多迷謬誤或造家術或用黃帝以來諸歷以推經傳朔日皆不得諧合日食於朔此乃天驗經傳又書其朔食可謂得天而劉賈諸儒說皆以為月二日或三日公違聖人明文其蔽在於守一元不與天消息也余感春秋之事嘗著歷論極言歷之通理其大指曰天行不息日月星辰各運其舍皆動物也物動則不一雖行度大量可得而限累日為月以新故

相序不得有毫毛之差此自然理也故春秋日有頻月而食者曠年不食者理不得一而算守恒數故厯無不有先後也始失於毫毛而尚未可覺積而成多以失弦望朔晦則不得不改憲以從之書所謂欽若昊天厯象日月星辰易所謂治厯明時言當順天以求合非為合以驗天者也推此論之春秋二百餘年其治厯變通多矣雖數術絕滅還尋經傳微旨大量可知時之違謬則經傳有驗學者固當曲循經傳月日日之食以考朔

晦也以推時驗而皆不然各據其學以推春秋此無異
度已之跡而欲削他人之足也余為歷論之後至咸寧
中善算李修夏顯依論體為術名乾度歷表上朝廷其
術合日行四分之數而微增月行用三百歲改憲之意
二元相推七十餘歲承以強弱強弱之差蓋少而適足
以遠通盈縮時尚書及史官以乾度與太始歷參校古
今記注乾度歷殊勝今其術具存時又并考古今十歷
以驗春秋知三統歷之最疎也今具列其時得失之數

又據經傳微旨證據及失閏旨考日辰朔晦以相發明
為經傳長厯諸經傳證據及失閏時文字謬誤皆甄發
之雖未必其得天蓋春秋當時文厯也學者覽焉

春秋長厯說

日行一度月行十三度十七分之七有奇日官當會集
此之遲疾以考成晦朔以投閏月閏月無中而北斗邪
指兩辰之間所以異於他月積此以相通四時八節無
違乃得成歲其微密至矣得其精微以合天道則事敘

而不憊故傳曰閏以正時時以作事然陰陽之運隨動而差差而不已遂與厯錯故仲尼丘明每於朔閏發文蓋矯正得失因以宣明厯數也劉子駿造三正厯以修春秋日蝕有甲乙者三十四而三正厯惟得一蝕比諸家既最疎又六千餘歲輒益一日凡歲當累日為次而故益之此不可行之甚者自古已來諸論春秋者多述謬誤或造家術或用黃帝已來諸厯以推經傳朔日皆不諧合日蝕於朔此乃天驗經傳又書其朔蝕可謂得

天而劉賈諸儒說皆以為月二日或三日公違聖人明文其弊在於守一元不與天消息也余感春秋之事嘗著厯論極言厯之通理其大指曰天行不息日月星辰各運其舍皆動物也物動則不一雖行度有大量可得而限累日為月累月為歲以新故相涉不得不有毫末之差此自然之理也故春秋日有頻月有蝕者曠年不蝕者理不得一而算守恆數故厯無不有先後也始失於毫毛而尚未可覺積而成多以失弦望晦朔則不得

不改憲以從之書所謂欽若昊天厯象日月星辰易所謂治厯明時言當順天以求合非為合以驗天者也推此論之春秋二百餘年其治厯變通多矣雖數術絕滅遠尋經傳微旨大量可知時之違謬則經傳有驗學者固當曲循經傳月日日蝕以考晦朔以推時驗而皆不然各據其學以推春秋此異於度已之迹而欲削他人足也余為厯諸論之後至咸寧中善竿者李脩卜顯依論體為術名乾度厯表上朝廷其術合日行四分數而

徵增月術用三百歲改憲之意二元相推七十餘歲承以強弱強弱之差蓋少而適足以遠通盈縮時尚書及史官以乾度與秦始歷參校古今記注乾度歷殊勝秦始歷上勝官歷四十五事今其術具存又并攷古今十歷以驗春秋知三統之最疏也

遺令

古不合葬明於終始之理同於無有也中古聖人改而合之蓋以別合無在更緣生以示教也自此以來大人

君子或合或否未能知生安能知死故各以已意所欲也吾往為臺郎嘗以公事使過密縣之邢山山上有塚問耕父云是鄭大夫祭仲或云子產之冢也遂率從者祭而觀焉其造塚居山之頂四望周達連山體南北之正而邪東北向新鄭城意不忘本也其隧道唯塞其後而空其前不填之示藏無珍寶不取於重深也山多美石不用必集洧水自然之石以為冢藏貴不勞工巧而此石不入世用也君子尚其有情小人無利可動歷千

載無毀儉之致也吾去春入朝因郭氏喪亡緣陪陵舊
義自表營洛陽城東首陽之南為將來兆域而所得地
中有小山上無舊冢其高顯雖未足比邢山然東奉二
陵西瞻宮闕南觀伊洛北望夷叔曠然遠覽情之所安
也故遂表樹開道為一定之制至時皆用洛水圓石開
隧道南向儀制取法於鄭大夫欲以儉自完耳棺器小

斂之事皆當稱此

晉書 遠一作遠 耕父御
覽作耕者祭作登有情作儉

酒論

重醞醇醴沃土泉清酣苦無常五味相并

北堂書鈔

王渾

字冲玄太原晉陽人魏司空昶子襲父爵京陵侯歷越騎校尉入晉進公位司徒

上武帝諫遣齊王攸之藩書

攸帝同母弟帝信荀勗等聞遣之藩

渾為尚書左僕射奏不納

伏承聖詔憲章古典進齊王攸為上公崇其禮儀遣攸之國昔周氏建國大封諸姬以藩帝室永世作憲至於公旦武王之弟左右王事輔濟大業不使歸藩明至親義著不可遠朝故也是故周公得以聖德光弼幼主忠

誠著於金縢光述文武仁聖之德攸於大晉姬旦之親也宜贊皇朝與聞政事實為陛下腹心不貳之臣且攸為人修絜義信加以懿親志存忠貞今陛下出攸之國假以都督虛號而無典戎幹方之實去離天朝不預王政傷母弟至親之體虧友于款篤之義懼非陛下追述先帝文明太后待攸之宿意也若以攸望重於事宜出者今以汝南王亮代攸亮宣皇帝子文皇帝弟也駿各處方任有內外之資論以後慮亦不為輕攸今之國適足

長異同之論以損仁慈之美耳而令天下窺陛下有不
崇親親之情臣竊為陛下不取也若以妃后外親任以
朝政則有王氏傾漢之權呂產專朝之禍若以同姓至
親則有吳楚七國逆亂之殃歷觀古今苟事輕重所在
無不為害也不可事事曲設疑防慮方來之患者也唯
當任正道而求忠良若以智計猜物雖親見疑至於疏
遠者亦何能自保乎人懷危懼非為安之理此最有國
有家者之深忌也愚以為太子太保缺宜留攸居之與

太尉汝南王亮衛將軍楊珧共為保傅幹理朝事三人
齊位足相持正進有輔納廣義之益退無偏重相傾之
勢令陛下有篤親親之恩使攸蒙仁覆之惠臣同國休
戚義在盡言心之所見不能默已私慕魯女存國之志
敢陳愚見觸犯天威欲陛下事每盡善冀萬分之助臣
而不言誰當言者

郡國計吏方俗之宜奏

渾惠帝時為司徒嘗
元會問渾渾奏然之

陛下欽明聖哲先於遠近明詔沖虛詢及芻蕘斯乃周

文疇咨之求仲尼不恥下問也舊三朝元會前計吏詣
軒下侍中讀詔計吏跪受臣以詔文相承已久無他新
聲非陛下留心方國之意也可令中書指宣明詔問方
土異同賢才秀異風俗好尚農桑本務刑獄得無寬濫
守長得無侵害其勤心政化興利除害者授以紙筆盡
意陳聞以明聖指垂心四遠不復因循常辭且察其答
對文義以觀計吏人才之實又先帝時正會後東堂見
征鎮長史司馬諸王國卿諸州別駕今若不能別見可

前詣軒下使侍中宣問以審察方國於事為便

並晉書

為裴楷請奏

楷為中書令加侍中與張華王戎並管機要楷有疾不樂處勢渾為

楷請不聽

楷受先帝拔擢之恩復蒙陛下寵遇誠竭節之秋也然楷性不競於物昔為常侍求出為河內太守後為侍中復求出為河南尹與楊駿不平求為衛尉及轉東宮班在時類之下安於淡退有識有以見其心也楷今委頓臣深憂之光祿勲缺以為可用今張華在中書王戎在

尚書足舉其契無為復令楷入名臣不多當見將養勿違其志要其遠濟之益

晉書

冒喪婚娶奏

元康二年渾為司徒奏尚書符下國子學處議助教吳商祭酒裴頠

議上詔
如所正

前以冒喪婚娶傷化悖禮下十六州推舉今本州中正各有言上太子家令虞濬有弟喪嫁女拜時鎮東司馬陳湛有弟喪嫁女拜時上庸太守王崇有兄喪嫁女拜時夏侯俊有弟子喪為息恒納婦恒無服國子祭酒鄒

湛有弟婦喪為息蒙娶婦拜時蒙有周服給事中王琛
有兄喪為息稜娶婦拜時并州刺史羊暨有兄喪為息
明娶婦拜時征西長史牽昌有弟喪為息彥娶婦拜時
湛職儒官身雖無服據為婚主按禮大功之末可以嫁
子小功之末可以娶婦無齊縗嫁娶之文虧違典憲宜
加貶黜以肅王法請臺免官以正清議

國子助教吳商議

今之拜時事畢便歸婚禮未成不得與娶婦者同也俊

琛稜並以齊縗娶婦娶妻所犯者重恒雖無服當不議而不諍亦禮所譏然其所犯者猶輕於稜也湛身既平吉子雖齊縗義服之末又不親迎吉凶別處所犯者輕濬暨為子拜時拜時禮輕當降也

國子祭酒裴顧議

吉凶之別禮之大端子服在凶而行嘉禮非所以為訓雖父兄為主事由已興此悉人倫大綱典章所慎也

惠帝詔報

下殤小功不以娶俊等簡忽喪紀輕違禮經皆宜如所

正

杜氏
通典

薦周馥表

馥為司徒左西
屬譚表許之

馥理識清正兼有才幹主定九品檢括精詳臣委任責
成褒貶允當請補尚書郎

請賜戰將鼓吹表

吳國臨戰牙門將張秦黃辰騎督秦母倪勇健效武破
賊制勝此三人之所致也秦辰已亡今倪獨在昔伐蜀

有小戰功牙門數人便加鼓吹至於減一國而有未得鼓吹者臣愚昧請聖詔賜倪鼓吹存錄猛將以盡武人之力也

乞醫表

臣有氣病善夜發服半夏湯或服湯不解尚取鍼前殿中醫趙恭思纂見給事在醫署纂能鍼有方伎乞以纂名課考稱課給臣自療治

立水碓表

洛陽百里內舊不得作水碓臣表上先帝聽臣立碓并

攬得官地

並太平御覽

王濟

字武子渾次子嗣封歷侍中

太常郭奕謚景議

太康八年太常上謚奕為景侯有司奏云晉受命以來祖

宗號謚羣下未有同者奕為景與景皇同不可聽宜謚曰穆王濟與羊璞成粲等議武帝

詔謚曰簡

按主者議謚避帝而不避后既不循古典不嫌同稱復
垂近代不襲帝后之例夫無窮之祚名謚不一若皆相

避於制難全如悉不避復非推崇事尊之禮宜依諱名
之議但及七廟祖宗而已不及遷毀之廟

首據杜氏
通典補

成紱武茂劉訥議

同謚非嫌號謚者國之大典所以厲時作教經天人之
遠旨也固雖君父義有所不隆及在臣子或以行顯故
能使上下邁德固有殆荒臣願聖世同符堯舜行周同
謚之禮舍漢魏近制相避之議

武帝詔答

非言君臣不可同正以奕謚景不相當耳宜謚曰簡

目孫楚品狀

楚與濟友善濟為本州大中正銓邑人品狀至楚曰此人非卿所能

目吾自為之
乃狀楚曰

天才英博亮拔不羣

並晉書

王濬

字士治弘農湖人歷特進散騎常侍平吳封襄陽侯

上武帝請伐吳疏

濬為益州刺史武帝詔修舟艦以備伐吳尋拜濬龍驤將

軍時朝議咸諫
濬上疏帝納焉

臣數叅訪吳楚同異孫皓荒淫凶逆荆揚賢愚莫不嗟

怨且觀時運宜速征伐若今不伐天變難預令皓卒死
更立賢主文武各得其所則強敵也臣作船七年日有
朽敗又臣年已七十死亡無日三者一乖則難圖也誠
願陛下無失事機

上武帝自理書

濬與王渾同伐吳而濬乘勝納
降渾表濬違詔不受節度詔讓

濬上書
自理

臣前被庾戌詔書曰軍人乘勝猛氣益壯便當順流長
騫直造秣陵臣被詔之日即便東下又前被詔書云太

尉賈充總統諸方自鎮東大將軍仙及渾濬彬等皆受充節度無令臣別受渾節度之文臣自達巴邱所向風靡知孫皓窮蹙勢無所至十四日至牛渚去秣陵二百里宿設部分為攻取節度前至三山見渾軍在北岸遣書與臣可變來過共有所議亦不語臣當授節度之意臣水軍風發乘勢造賊城加宿設部分行有次第無緣得於長流之中迴船過渾令首尾斷絕須臾之間皓遣使歸命臣即報渾書并寫皓牋具以示渾使速來當於

石頭相待軍以日中至秣陵暮乃被渾所下當受節度之符欲令臣明十六日悉將所領還圍石頭備皓越逸又索蜀兵及鎮南諸軍人名定見臣以為皓已來首都亭無緣共合空圍又兵人定見不可倉卒皆非當今之急不可承用中詔謂臣忽棄明制專擅自由伏讀嚴詔驚怖悚慄不知軀命當所投厝豈惟老臣獨懷戰灼三軍上下咸盡喪氣臣受國恩任重事太常恐託付不效孤負聖朝故投身死地轉戰萬里被蒙寬恕之恩得從

臨履之宜是以憑賴威靈幸而能濟皆是陛下神策廟
算臣承指授效鷹犬之用耳有何勲勞而恃功肆意寧
敢昧利而違聖詔臣以十五日至秣陵而詔書以十二
日起洛陽其間懸濶不相赴接則臣之罪責宜蒙察恕
假令孫皓猶有螳螂舉斧之勢而臣輕軍單入有所虧
喪罪之可也臣所統八萬餘人乘勝席卷皓以衆叛親
離無復羽翼匹夫獨立不能庇其妻子雀鼠貪生苟乞
一活耳而江北諸軍不知其虛實不蚤縛取自為小誤

臣至便得更見怨恚竝云守賊百日而令他人得之言
語噂喑不可聽聞案春秋之義大夫出疆由有專輒臣
雖愚忝以為事君之道唯當竭節盡忠奮不顧身量力
受任臨事制宜苟利社稷殒生以之若其顧護嫌疑以
避咎責此是人臣不忠之利實非明主社稷之福也臣
不自料忘其鄙劣披布丹心輸寫肝腦欲竭股肱之力
加之以忠貞庶必掃除兇逆清一宇宙願令聖世與唐
虞比隆陛下竊察臣之愚款而識其欲自效之誠是以

授臣以方牧之任委臣以征討之事雖燕主之信樂毅漢祖之任蕭何無以加焉受恩深重死且不報而以頑踈舉錯失宜陛下弘恩財加切讓惶怖忸營無地自厝願陛下明臣赤心而已

復表

渾又騰周浚書云渚軍得吳寶物
渚復表詔勿推封渚襄陽縣侯

被壬戌詔書下安東將軍所上揚州刺史周浚書謂臣諸軍得孫皓寶物又謂牙門將李高放火燒皓偽宮輒公文上尚書具列本末又聞渚案陷上臣臣受性愚忠

行事舉動信心而前期於不負神明而已秣陵之事皆如前所表而惡直醜正實繁有徒欲構南箕成此貝錦公於聖世反白為黑夫佞邪害國自古而然故無極破楚宰嚭滅吳及至石顯傾亂漢朝皆載在典籍為世所戒昔樂毅伐齊下城七十而卒被讒間脫身出奔樂羊既反謗書盈篋況臣頑疎能免讒慝之口然所望全其首領者實賴陛下聖哲欽明使浸潤之譖不得行焉然臣孤根獨立朝無黨援久棄遐外人道斷絕而結恨彊宗

取怨豪族以累卵之身處雷霆之衝繭栗之質當豺狼之路其見吞噬豈抗脣齒夫犯上干主其罪可救乖忤貴臣則禍在不測故朱雲折檻嬰逆鱗之怒慶忌救之成帝不問望之周堪違忤石顯雖闔朝嗟歎而死不旋踵此臣之所大怖也今渾之支黨姻族內外皆根據磐牙並處世位聞遣人在洛中專共交構盜言孔甘疑惑觀聽夫曾參之不殺人亦以明矣然三人傳之其母投杼今臣之信行未若曾參之著而讒構沸騰非徒三夫

之對外內扇助為二五之應夫猛獸當途麒麟恐懼況
臣脆弱敢不悚慄偽吳君臣今皆生在便可驗問以明
虛實前偽中郎將孔攄說云二月武昌失守水軍行至
皓案行石頭還左右人皆跳刀大呼云要當為陛下一
死戰決之皓意大喜謂必能然便盡出金寶以賜與之
小人無狀得便持走皓懼乃圖降首降使適去左右劫
奪財物畧取妻妾放火燒宮皓逃身竄首恐不脫死臣
至遣叅軍主者救斷其火耳周浚以十六日前入皓宮

臣時遣記室吏往視書籍浚使收縛若有遺寶則浚前
得不應移蹤後人欲求苟免也臣前在三山得浚書云
皓散寶貨以賜將士府庫畧虛而今復言金銀篋笥動
有萬計疑臣軍得之言語反覆無復本末臣復與軍司
張牧汝南相馮純等共入觀皓宮乃無席可坐後日又
與牧等共視皓舟船渾又先臣一日上其船船上之物
皆渾所知見臣之案行皆出其後若有寶貨渾應得之
又臣將軍素嚴兵人不得妄離部陣間在秣陵諸軍凡

二十萬衆臣軍先至為土地之主百姓之心皆歸仰臣
臣切勅所領秋毫不犯諸有市易皆有伍任證左明從
券契有違犯者凡斬十三人皆吳人所知也餘軍縱橫
詐稱臣軍而臣軍類皆蜀人幸以此自別耳豈獨浚之
將士皆是夷齊而臣諸軍悉聚盜跖邪時有八百餘人
緣石頭城劫取布帛臣牙門將軍馬潛即收得二十餘
人并疏其督將姓名移以付浚使得自科結而寂無反
報疑皆縱遣絕其端緒也又聞吳人言前張悌戰時所

殺財有二千人而渾浚露布言以萬計以吳剛子為主
簿而遣剛至洛欲令剛增斬級之數可具問孫皓及其
諸臣則知其定審若信如所聞浚等虛詐尚欺陛下豈
惜於臣云臣屯聚蜀人不時送皓欲有反狀又恐動吳
人言臣皆當誅殺取其妻子冀其作亂得騁私忿謀反
大逆尚以見加其餘謗嗜故其宜耳渾案臣瓶罄小器
蒙國厚恩頻繁擢敘遂過其任渾此言最信內省慙懼
今年平吳誠為大慶於臣之身更受咎累既無益側策

馬之好而令濟濟之朝有諛邪之人虧穆穆之風損皇代之美由臣頑䟽使致於此拜表流汗言不識次

壬戌一作戌

戊戌

並晉書

何惲

廬江潯人光祿大夫楨子

與周浚牋

浚字開林汝南安成人為揚州刺史隨王渾伐吳大破孫皓軍別駕何惲

說浚渾宜速渡江不聽及王渚直指三山皓遂降渚渚欲爭功惲牋與浚諫止渚又不納

遂相表奏

書畧克讓易大謙先斯古文所詠道家所崇前破張悌

吳人失氣龍驤因之陷其區宇論其前後我實緩師動則為傷事則不及而今方競其功彼既不吞聲將虧雍穆之弘興矜爭之鄙斯愚情之所不取也

晉書 勳則二句通鑑作

既失機會不及於事

蔡珪

汝南人

與弟敏書

初吳未平周浚在弋陽南北為互市諸將多相襲奪以為功吳將蔡敏守

沔中其兄珪為將在秣陵與敏書候者得珪書以呈浚浚曰君子也

古者兵交使在其間軍國固當舉信義以相高而聞疆

場之上往往有襲奪互市甚不可行弟慎無為小利而

忘大備也

晉書

唐彬

字儒宗魯國鄒人為廣武將軍吳平封上庸縣公終雍州刺史

徵雍州處士教

皇甫申四人皆到彬散待之

此州名都士人林藪處士皇甫申叔嚴舒龍姜茂時梁

子遠等並志節清妙履行高潔踐境望風虛心饑渴思

加延致待以不臣之典幅巾相見論道而已豈以吏職屈

染高規郡國備禮發遣以副於邑之望

晉書

陶璜

字世英丹陽秣陵人仕吳交州牧歸晉封宛陵侯改冠軍將軍

論交州不宜減兵奏

璜歸晉仍牧交州時以吳平減州郡兵璜奏武帝從

之

交土荒裔斗絕一方或重譯而言連帶山海又南郡去
州海行千有餘里外距林邑纔七百里夷帥范熊世為
逋寇自稱為王數攻百姓且連接扶南種類猥多朋黨
相倚負險不賓往隸吳時數作寇逆攻破郡縣殺害長
吏臣以厯駕昔為故國所採偏戍在南十有餘年雖前

後征討翦其魁桀深山僻穴尚有逋竄又臣所統之卒
本七千餘人南土溫濕多有氣毒加累年征討死亡減
耗其見在者二千四百二十人今四海混同無思不服
當卷甲消刃禮樂是務而此州之人識義者寡厭其安
樂好為禍亂又廣州南岸周旋六十餘里不賓屬者乃
五萬餘戶及桂林不羈之輩復當萬戶至於服從官役
纔五千餘家二州脣齒唯兵是鎮又寧州興古接據上
流去交趾郡千六百里水陸並通互相維衛州兵未宜

約損以示單虛夫風塵之變出於非常臣亡國之餘議
不足採聖恩廣厚猥垂飾擢蠲其罪豐改授方任去辱
即寵拭目更視誓念投命以報所受臨履所見謹冒瞽

陳

晉書

交州論輸珠表

合浦郡土地境埆無有田農百姓唯以採珠為業商賈
去來以珠貨米而吳時珠禁甚嚴慮百姓私散好珠禁
絕來去人以饑困又所調猥多限每不充今請上珠輸

二次者輸一麤者蠲除自十月訖二月非採上珠之時

聽商旅往來如舊

王隱
晉書

滕並

上議父廣州牧脩謚表


脩南陽西鄂人仕吳廣州牧吳亡歸晉仍牧廣

州卒謚聲子並
表上賜謚曰忠

亡父脩羈紲吳壤為所驅馳幸逢開通沐浴至化得從
俘虜握戎馬之要未覲聖顏委南藩之重實由勲勞少
聞天聽故也年衰疾篤屢乞骸骨未蒙垂哀奄至薨隕

臣承遺意輿觀還都瞻望雲闕實懷痛裂竊聞博士謚
脩曰聲直彰流播不稱行績不勝愚情冒昧聞訴

晉書



西晉文紀卷七

欽定四庫全書

集部

西晉文紀卷八

詳校官庶吉士_臣初喬齡

主事銜_臣徐以坤覆勘

覆校官博士_臣劉光第

校對官中書_臣范 鏊

謄錄舉人_臣呂日永

欽定四庫全書

西晉文紀卷八

明梅鼎祚編

西晉八

山濤

字巨源河內懷人仕魏尚書吏部郎入晉加奉車都尉進爵新沓伯加光祿大夫拜司徒

謝武帝表

濤為尚書左僕射領吏部以老疾固辭久不攝職為左丞白哀所奏帝寢

不聞濤表謝

帝手詔報之

古之王道正直而已陛下不可以一老臣為加曲私臣亦何心屢塵日月乞如所表以章典刑

武帝手詔

白哀奏君甚妄所以不即推直不喜凶赫耳君之明度
宣當介意邪便當攝職令斷章表也

告退疏

濤再居選職十有餘年
後以年衰疾篤上疏

臣年垂八十救命旦夕若有毫末之益豈遺力於聖時
迫以老耄不復任事今四海休息天下思化從而靜之
百姓自正但當崇風尚教以敦之耳陛下亦復何事臣
耳目聾瞶不能自勵君臣父子其間無文是以直陳愚

情乞聽所請

武帝詔報

天下事廣加吳土初平凡百草創當共盡意化之君不
深識往心而以小疾求退豈所望於君邪朕猶側席未
得垂拱君亦何得高尚其事乎當崇至公勿復為虛飾
之煩

讓拜司徒表

臣事天朝三十餘年卒無豪釐以崇大化陛下私臣無

已猥受三司臣聞德薄位高力少任重上有折足之凶
下有廟門之咎願陛下垂累世之恩乞臣骸骨

武帝詔報

君翼贊朝政保乂皇家匡佐之勲朕所倚賴司徒之職
實掌邦教故用敬授以荅羣望豈宜沖讓以自抑損邪
已勅斷章表

答武帝表

濤子淳不仕允奉車都尉並少
疋病帝聞其聰敏欲見之濤表

臣二子疋病宜絕人事不敢受詔

山公啟事

濤太始中為吏部尚書再舉選職十有餘年每一官缺輒啟擬數人詔旨

所向然後顯奏而帝之所用或非舉首甄拔人物各為題目時稱山公啟事 吏部郎

侍中尚書僕射奉車都尉新沓伯臣濤言臣近啟崔諒
史曜陳准可補吏部郎詔書可爾此三人皆衆論所稱
諒尤質正少華可以敦教雖大化未可倉卒風尚所勸
為益者多臣以為宜先用諒謹隨事以聞

閣帖

又

人才既自難知中人已下情偽又難測吏部郎以碎事

日夜相接非但當正已而已乃當能正人不容穢雜也
議郎杜默德履亦佳太子庶子崔諒中郎陳淮皆有意
正人其次不審有可用者不

又

武帝以咸觥酒浮虛遂用陸亮 世說云山
司徒舉無失才凡所題目皆如其言唯用陸
亮是詔所用爭之
不從亦尋賄敗

吏部郎主選舉宜得能整風俗理人倫者史曜出處缺
散騎侍郎阮咸真素寡欲深識清濁萬物不能移也若
在官人之職必妙絕於時

又諸郎

舊選尚書郎極清望號稱大臣之副州取尤者以應雍州久無郎前尚書郎傅祗坐事免官在職日淺其州人才無先之者請以補職不審可復用否

又

荊州宜都有郎王恒之以病出義陽郡鄧遐有才義論者以為宰士之儔而未滿之年臣以為宜先用之

又

侍中彭權遷當選代按雍州刺史郭奕高簡有雅量在
兵間少不盡下情處朝廷足以肅正左右衛將軍王
濟才高美茂後來之冠此二人誠顧問之秀聖意儻惜
濟貴之驍騎將軍荀愷智罷明敏其典宿衛終不減濟
祭酒庾純強正有學亦堪取選國學初建王荀已亡純
能其事宜當小留粗立其制不審宜爾有當聖旨者不
又云侍中彭權儒素有學義宜太常選也

又

詔侍中缺當復得人誰可者雍州刺史郭奕右衛將軍王濟皆誠直忠亮有美才侍中之最高者也

武帝詔答

濟領禁兵不欲使轉也

又

侍中太常河南尹並缺皆顯職宜必得其人右軍裴楷

通理有才義僉論宜以為侍中

御覽作侍中才

又詔選秘書丞濤薦

嵇紹詔答

秘書

紹平簡溫敏有文思又曉音當成濟也猶宜先作秘書

郎

晉書康誥有言父子罪不相及嵇紹賢侔卻缺宜加旌命請為秘書郎

詔答

紹如此便可為丞不足復為郎也

世說注

又

宗正卿

羊祜忠篤寬厚然不長理劇宗正卿缺不審可轉作否

又

尚書令

尚書令李膺遷處缺宜得其人征南大將軍羊祜體義

正直可以整肅朝廷裁制時政

又宮臣

太子始傳之東宮四海屬目保傅之官不可不高盡天下之選羊祜秉德尚義可出入周旋令太子每覩儀刑方任雖重比此為輕又可朝會與聞國議

又

臣昨啓太子少傅羊祜秉德尚義克已復禮又年尚少可久於其事也

又

郤令諸葛京祖父亮遇漢亂分隔父子在蜀雖不達天命要為盡心所事京治郤自復有稱臣以為宜以補東

宮舍人以明事人之理副梁益之論

京字行宗
瞻次子

又

臣近舉汜源為太子舍人源見稱有德素久沈滯舉為大臣欲以尉後聞之士

又

中庶子賈模遷缺東宮官屬宜得高茂求脩一人則難
猶宜先德素令選太尉長史劉粹光祿長史周蔚惟加

所裁

詔用粹 又云中庶子賈模
遭缺周蔚純粹篤誠宜補

又

中庶子缺宜得俊茂者以濟陰太守劉儼城陽太守石
崇參選不審可有合聖意者不

又

瑯琊王子繇隴西王世子越誠宜早令奉侍皇太子校

德東宮若蕙庶子

又

中庶子東宮顯選今有二缺衆議咸以領兵太守荀寓
為之

又

太子左衛率缺侍衛威重宜得其才無疾患者城陽太
守石崇忠篤有文武才河東太守焦勝清貞著信義皆

其選也

一云城陽太守石崇北中郎軍司
孫尹忠篤有文武才皆其選也

又

中郎衛昱為少府丞甚有頗益後坐賣偷石事免官今
太子門夫缺不審可參選不

又

皇太子東宮多用雜材為官屬宜令純取清德太子舍
人夏侯湛字孝若有盛德而不長治民有益臺閣在東
宮已久今殿中郎缺宜得才學不審其可遷此選否

治一

作理

又長吏

近啓修武令劉納補南陽王友詔曰友誠宜得有益者
然以長吏治民不宜屢易為疑令散人無依仰今者職
散中誠自有人然劉納才志內外非稱臣以為宜蒙此
者是以啓及不審固可用不詔可爾
所啓

又

溫令許奇等並見稱名雖在職各曰淺宜顯報大郡以
勸天下

詔答

案其資歷悉自足為郡守各以在職日淺則宜盡其政績不宜速他轉也

又

晉制春夏農月不遷改長吏郡守縣令之屬以其妨農

事故也

又議郎許允宜
泰廣漢太守選

又黃散

郝詵才志罷局堪為黃散

謂黃門侍郎散騎常侍
云散騎常侍缺當取有素行

者補之遂
舉却說

又

黃門侍郎和嶠最有才可為吏部郎

詔答

欲令在左右更求其次

又

黃門侍郎荀彧清和理正動可觀採真侍衛之美者

又

鴻臚職主胡事前後為之者率多不善了今缺當選御史中丞刁攸舊能人也不審可爾不

又

御史中丞刁攸舊人年衰近損百寮未甚為憚坐治政事改尚書可也

又

孔顥有才能果勁不撓以為御史中丞

又御史中丞周浚果烈有才用

又

治書侍御史王啓識朗明正後來之俊也

又

舊侍御史頗用郡守今散二千石有才能尚少者可用

不詔使八座詳之

又

中書屬通事令史孫絀限滿久習內事才宜殿中侍

御史湏空補之不審可否詔曰可

又

今尚書郎御史東宮洗馬舍人多缺宰士中後進美者
太尉掾樂廣字彥輔司徒掾劉琚字伯瑜王瓚字正長
司空掾王正字士則劉澹字初平征西將軍掾諸葛缺
皆其選也

又云太尉掾滿奮樂廣司徒掾何勗劉琚司徒掾官粹王正劉澹太尉掾劉遐有才義宰

士之
雋也

又

河南尹京輦重職前代皆用名人聖代已來有李膺杜
預王恂雋不疑復今減此者也

又將軍

游擊將軍諸葛沖精果有文武才擬補兗州

詔答

沖領兵未欲出外也

又

大將軍雖不整正須筋力戎馬間猶宜得健者征北大將軍璿貞正靜一中書監勗達練事物二人皆人彥不審有可參舉者不

又司馬

平南司馬缺案瑯邪李鎮綱紀郡事練習兵馬良才也

又北中郎將司馬缺當便選尚書郎趙虞誠篤有意略
軍間用長鎮西長史缺案尚書郎張勃軍間用長

太尉長史缺案大將軍掾泰山胡伯長才長方用太
尉長史鄧毅通識有文武才太尉軍司缺當選上宰

監軍得當有資重者北中郎
長史當更前御史耿遷有罷幹

又

晉制諸坐公事者皆三年方得叙用其中多有好人令
逍遙無事臣以為略依左遷法隨資才減之亦足懲戒

而官不失其用

詔善之 以上見王隱晉書唐撰晉書
晉諸公讚楚國先賢傳世說新語藝文

類聚北堂書鈔初學記杜氏通典
太平御覽鄭樵通志文獻通考

論卻詵除服表奏

太康中衛瓘表下司徒部博
士議詵表自理詔問濤答

尚書令衛瓘論卻詵不應除服表

前太子洗馬濟陰卻詵寄止衛國文學講堂十餘年母
亡不致喪歸便於堂北壁外下棺謂之假葬三年即吉
詔用為征東叅軍或以為城市之內屋壁之間無葬處
不成葬則不應除服主者連欲明用權不過其舉

卻說自理表

臣生三月而孤隨母依外祖舅為縣悉將家以咸寧二年母亡家自祖以下十四墳在族氏而墓地數有水規悉遷改常多疾病遂便留此此方下濕唯城中高故遂葬於所居之宅祭於所養之堂不知其不可也

山濤答詔

詔問山濤濤答

說前喪母得疾不得葬送於壁後假葬服終為平輿長史論者以為不正合禮是以臣前疑之說文義可稱又

金安口廬公集 卷八
甚貧儉訪其邑黨亦無有他

又詔問應清議
與否濤又答

自為不與常同便令人非恐負其孝慕之心宜詳極盡
同異之論

兖州大中正魏舒與山濤書

郤詵至孝中間去郎正為母耳居喪毀瘁殆不自全其
父喪在族氏欲改葬不能自致故過時不葬後於家堂
北假葬埏道通堂中不時閉服欲闋乃閉葬後經年乃

見用作平輿監軍長史任意傷俗以葬不時閉常為作
口語其事灼然無所為疑

衛瓘又與山濤書

凡以意相是非者不可輕以相貶也

杜氏
通典

啓事

初濤啓以卻詵為溫
今詵可又啓詵答

訪聞詵喪母不時葬遂於所居屋後假葬有異同之議
請更選之

詔答

君為管人倫之職此輩應為清議與不便當裁處之

山簡

字季倫潯少子歷僕射
出為征南將軍鎮襄陽

令朝臣各舉所知疏

簡為尚書左僕射領
吏部奏朝廷從之

臣以為自古興替實在官人苟得其才則無物不理書
言知人則哲惟帝難之唐虞之盛元愷登庸周室之隆
濟濟多士秦漢以來風雅漸喪至於後漢女君臨朝尊
官大位出於阿保斯亂之始也是以郭泰許邵之倫明
清議於草野陳蕃李固之徒守忠節於朝廷然後君臣

名節古今遺典可得而言自初平之元訖於建安之末
三十年中萬姓流散死亡略盡斯亂之極也世祖武皇
帝應天順人受禪於魏泰始之初躬親萬機佐命之臣
咸皆率職時黃門侍郎王恂庾純始於太極東堂聽政
評尚書奏事多論刑獄不論選舉臣以為不先所難而
辨其所易陛下初臨萬國人思盡誠每於聽政之日命
公卿大臣先議選舉各言所見後進雋才鄉邑尤異才
堪任用者皆以名奏主者隨缺先叙是爵人於朝與衆

共之之義也

與王衍書

蔡克字子尼未仕時簡嘗與衍書衍以書示衆曰山子以一字拔人然未

易可稱後聞克在選持正曰山子正人之言驗於今矣

蔡子尼今之正人

並晉書

劉伶

字伯倫沛國人為建威參軍泰始初對策盛言無為之化以無用罷竟以壽終案廣川

書跋七賢帖劉伶作劉靈然梁自有劉靈善書畫

酒德頌

竹林七賢論劉伶處天地間悠悠蕩蕩無所用心未嘗措意文章著酒德頌一

篇世說新語陳留阮籍譙國嵇康河內山濤沛國劉伶陳留阮咸河內向秀琅邪王戎

七人嘗集竹林之下肆意
酣暢故世謂竹林七賢

有大人先生者以天地為一朝萬期為頃與日月為局
牖八荒為庭衢行無轍迹居無室廬幙天席地縱意所
如止則操卮執觚動則挈榼提壺惟酒是務焉知其餘
有貴介公子搢紳處士聞吾風聲議其所以乃奮袂攘
襟怒目切齒陳說禮法是非蜂起先生於是方捧罋承
槽銜杯漱醪奮髯箕踞枕麴藉糟無思無慮其樂陶陶
兀然而醉恍爾而醒靜聽不聞雷霆之聲熟視不覩泰

山之形不覺寒暑之切肌利欲之感情俯觀萬物擾擾
馬若江漢之載浮萍二豪侍側焉如蜾蠃之與螟蛉書

晉

論止竹林七賢
作行觀作見

酒呪

伶妻捐酒毀器泣諫伶酒太過非攝生之道必宜斷之伶曰當祝神明自誓耳令妻

具酒內跪呪仍飲
酒御肉隗然復醉

天生劉伶以酒為名一飲一石五斗解醒婦人之言慎

莫可聽

竹林名士傳
晉書作不呪作祝

莫

向秀

字子期河內懷人歷散
騎常侍在朝不任事

思舊賦序

嵇康善鍛秀為之佐相對欣然又共
呂安灌園山陽及康誅秀因郡計入

洛作
賦

余少與嵇康呂安居止接近其人並有不羈之才然嵇
志遠而踈呂心曠而放其後各以事見瀆嵇博綜技藝
於絲竹特妙臨當就命顧視日影索琴而彈之余逝將
西邁經其舊廬於時日薄虞淵寒永淒然鄰人有吹簫
者發聲寥亮追思曩昔遊宴之好感音而嘆故作賦云

文選

淵

晉書作泉

阮咸

字仲容籍兄子
歷始平太守

與姑書

咸先幸姑家鮮卑婢及居母喪姑當遠
移將去咸借客驢著重服自追之累騎

而返曰人種不可失及生子字與姑書
姑答字遙集仕吏部尚書廣州刺史

胡婢遂生胡兒

姑答書

魯靈光殿賦曰胡人遙集於上楹可字曰遙集也

阮孚
別傳

阮脩

字宣子咸從子歷太子
洗馬避亂為賊所害

大鵬贊

蒼蒼大鵬誕自北溟假精靈鱗神化以生如雲之翼如
山之形海運水擊扶搖上征翕然層舉背負太清志存
天地不屑雷霆鸞鳩仰笑尺鷃所輕超世高逝莫知其

情

晉書 書鈔載修惠雨賦序云景元二
年余耕陽武之地在乎沙堆汴水之陽

王衍

字夷甫琅邪臨沂人司徒戎從弟歷遷
太尉為元帥拒石勒為勒所破見害

謝表

蒙賜臣單衣紫綃金革帶臣謹佩服終矢弗諉

北堂書鈔

有司奏王衍

衍女為愍懷太子妃太子為賈
后所誣衍自表離婚及后既廢

奏衍禁

錮從之

衍與司徒梁王彤書寫呈皇太子手與妃及衍書陳見
誣之狀彤等伏讀辭旨懇惻衍備位大臣應以義責也
太子被誣得罪衍不能守死善道即求離婚得太子手
書隱蔽不出志在苟免無忠蹇之操宜加顯責以厲臣
節可禁錮終身

王澄

字平子衍弟歷荊州刺史元帝
徵為軍諮祭酒為弟敦所害

與人稱胡毋彥國書

胡毋輔之字彥國泰山奉
高人與王澄王敦庾敳俱

為太尉王衍所昵號曰四友澄嘗
與人書輔之渡江歷湘州刺史

彥國吐佳言如鋸木屑霏霏不絕誠後進領袖也

與人稱兒微書

永嘉流人名云澄第四子微王澄別傳云微邁上有父風

風氣日上足散人懷

並世說尺牘增云兒微風日上

司馬彪

字紹統高陽王睦長子出後宣帝弟敏歷秘書郎散騎侍郎

與山濤書

根拔失據託命此別告求矜愍許見賑恤窮人易感悲

喜兼懷承命之後情過挾纊

太平御覽

駁祀六宗表

虞書禋于六宗孔安國曰宗尊也其祀有六埋少牢於太昭祭時相

近於坎壇祭寒暑王宮祭日夜明祭月幽崇祭星雩崇祭水旱伏生馬融曰六宗天地四時也劉歆謂水火雷風川澤賈逵謂日月星辰海河鄭玄謂星辰司中司命風伯雨師至晉彪等以六宗不應特立表駁幽州秀才張髦亦上疏遂罷見後漢書注晉書不載

臣以為帝在於類則禋者非天山川屬望海岱非宗宗猶包山則望何秩焉伏與歆達失其意也六合之間非制典所及六宗之數非一位之名陰陽之說又非義也并五緯以為一分文昌以為二箕畢既屬於辰風師雨

師復特為位立之失也安國案祭法為宗而除其天地於上遺其四方於下取其中以為六宗四時寒暑日月衆星并水旱所宗者八非但六也傳曰山川之神則水旱厲疫之灾於是乎禋之日月星辰之神則雪霜風雨之不時於是乎禋之又曰龍見而雩如此禋者祀日月星辰山川之名雩者周人四月祭天求雨之稱也雪霜之灾非夫禋之所禳雩祭之禮非正月之所祈周人之後說有虞之典故於學者未盡喻也且類於上帝即禮

天也望於山川禋所及也案周禮云昊天上帝日月星辰司中司命風師雨師社稷五祀五嶽山林川澤四方百物又曰兆五帝於四郊四類四望亦如之無六宗之兆祭法云祭天祭地祭時祭寒暑日月星祭水旱祭四方及山林川谷丘陵能出雲為風雨見怪物皆是有天下者祭百神非此族也不在祀典復無六宗之文明六宗所禋即祭法之所及周禮之所祀即虞書之所宗不宜特復立六宗之祀也春官大宗伯之職掌玉作六器

以禮天地四方以蒼璧禮天以黃琮禮地以青圭禮東方以赤璋禮南方以白琥禮西方以玄璜禮北方天宗日月星辰寒暑之屬也地宗社稷五祀之屬也四方之宗者四時五帝之屬也如此則羣神咸秩而無廢百禮徧修而不瀆於理為通

張髦

論六宗疏

禋於六宗禮祖考所尊者六也何以考之周禮及禮記

王制天子將出類於上帝宜于社造于禰巡狩四方覲諸侯歸格于祖禰用特堯典亦曰肆類于上帝禋于六宗望於山川徧于羣神班瑞于羣后肆覲東后叶時月正日同律度量衡巡狩一歲以周爾乃歸格於藝祖用特臣以尚書與禮三制同事一義符契相合禋于六宗正謂祀祖考宗廟也文祖之廟六宗即三昭三穆也若如十家之說既各異義上下違背且没乎祖之禮考之禮考之祀典尊卑失序若但類于上帝不禋祖禰而行

去時不告歸何以格以此推之較然可知也禮記曰考
政必本於天穀以降命命降於社之謂穀地降於祖廟
之謂仁義降於山川之謂興作降於五祀之謂制度又
曰祭帝於郊所以定天位也祀社於國所以列地利也
祭祖於廟所以奉仁也山川所以儋鬼神也五祀所以
本事也又曰禮行於郊而百神受職焉禮行於社而百
貨可極焉禮行于祖廟而孝慈服焉禮行於五祀而正
法則焉故自郊社祖廟五祀義之修而禮之藏也凡此

皆孔子所以祖述堯舜紀三代之教著在祀典首尾相證皆先天地次祖宗而後山川羣神耳故禮祭法曰七代之所更變者禘郊宗祖明舜受終文祖之廟察璇璣考七政審已天命之定遂上郊廟當義合堯典則周公其人也郊祀后稷以配天宗祀文王於明堂以配上帝是以四海之內各以其職來祭者也居其位攝其事郊天地供羣神之禮巡狩天下而遺其祖宗恐非有虞之志也五嶽視三公四瀆視諸侯皆以案先儒之說而以

水旱風雨先五嶽四瀆從祖考而次上帝錯於肆類而亂祀典臣以十一家皆非也

魏舒

字陽元任城樊人仕魏尚書郎相國參軍封劇陽子晉歷位司徒

六宮娉使奏

舒為左僕射領吏部上言有詔詳之衆議異同遂寢

今選六宮娉以玉帛而舊使御府丞奉娉宣成嘉禮贊重使輕以為拜三夫人宜使卿九嬪使五官中郎將美人良人使謁者於典制為弘

晉書

劉毅

字仲雄東萊掖人歷尚書左僕射光祿大夫

趙王倫罪駁

倫使散騎將劉緝買工所將盜御
裘廷尉杜友正緝棄市倫與同罪

有司奏倫爵重屬親毅為諫議

大夫駁武帝是毅駁詔赦之

王法賞罰不阿貴賤然後可以齊禮制而明典刑也倫
知表非常蔽不語吏與緝同罪當以親貴議減不得闕
而不論宜自於一時法中如友所正

諫賀龍表

龍見武庫井中帝親觀之百
官將賀毅為左僕射表諫

昔龍降鄭時門之外子產不賀龍降夏庭沫流不禁卜
藏其聚至周幽王禍釁乃發易稱潛龍勿用陽在下也

證據舊典無賀龍之禮

武帝詔答

正德未修誠未有以膺受嘉祥省來示以為瞿然賀慶
之事宜詳依典義動靜數示

尚書郎劉漢等議

詔不聽

龍體既蒼雜以素文意者大晉之行戢武興文之應也
而毅乃引衰世妖異以疑今之吉祥又以龍在井為潛
皆失其意潛之為言隱而不見今龍彩質明煥示人以

物非潛之謂也毅應推處

論九品八損疏

武帝優詔答之竟不施行

臣聞立政者以官才為本官才有三難而興替之所由也人物難知一也愛憎難防二也情偽難明三也今立中正定九品高下任意榮辱在手操人主之威福奪天朝之權勢愛憎決於心情偽由於已公無考校之負私無告訐之忌用心百態求者萬端廉讓之風滅苟且之俗成天下詢訥但爭品位不聞推讓竊為聖朝耻之夫

名狀以當才為清品輩以得實為平安危之要不可不
明清平者政化之美也枉濫者亂敗之惡也不可不察
然人才異能備體者寡器有大小達有早晚前鄙後修
宜受日新之報抱正違時宜有質直之稱度遠闕小宜
得殊俗之狀任直不飾宜得清實之譽行寡才優宜獲
器任之用是以三仁殊塗而同歸四子異行而均義陳
平韓信笑侮於邑里而收功於帝王屈原伍胥不容於
人主而顯名於竹帛是篤論之所明也今之中正不精

才實務依黨利不均稱尺務隨愛憎所欲與者獲虛以
成譽所欲下者吹毛以求疵高下逐強弱是非由愛憎
隨世興衰不顧才實衰則削下興則扶上一人之身旬
日異狀或以貨賂自通或以計協登進附託者必達守
道者困悴無報於身必見割奪有私於己必得其欲是
以上品無寒門下品無勢族暨時有之皆曲有故慢主
罔時實為亂源損政之道一也置州都者取州里清議
咸所歸服將以鎮異同一言議不謂一人之身了一州

之才一人不審便坐之若然自仲尼以上至于庖犧莫
不有失則皆不堪何獨責於中人者哉若殊不修自可
更選今重其任而輕其所立品格還訪刁攸攸非州
里之所歸非職分之所置今訪之歸正於所不服決事
於所不職以長讒構之源以生垂爭之兆似非立都之
本旨理俗之深防也主者既善刁攸攸之所下而復選
以二千石已有數人劉良上攸之所下石公罪攸之所
行駁違之論橫於州里嫌讐言之隙結於大臣夫桑妾之

訟禍及吳楚鬪難之變難興魯邦況乃人倫交爭而部
黨興刑獄滋生而禍根結損政之道二也本立格之體
將謂人倫有序若貫魚成次也為九品者取下者為格
謂才德有優劣倫輩有首尾今之中正務自遠者則抑
割一國使無上人穢劣下比則拔舉非次并容其身公
以為格坐成其私君子無大小之怨官政無繩姦之防
使得上欺明主下亂人倫乃使優劣易地首尾倒錯推
貴異之器使在凡品之下負戴不肖越在成人之首損

政之道三也陛下踐阼開天地之德下不諱之詔納忠
直之言以覽天下之情太平之基不世之法也然賞罰
自王公以至於庶人無不加法置中正委以一國之重
無賞罰之防人心多故清平者寡故怨訟者衆聽之則
告訐無已禁絕則侵枉無極與其理訟之煩猶愈侵枉
之害今禁訟訴則杜一國之口培一人之勢使得縱橫
無所顧憚諸受枉者抱怨積直獨不蒙天地無私之德
而長壅蔽於邪人之銓使上明不下照下情不上聞損

政之道四也昔在前聖之世欲敦風俗鎮靜百姓隆鄉黨之義崇六親之行禮教庠序以相率賢不肖於是見矣然鄉老書其善以獻天子司馬論其能以官於職有司考績以明黜陟故天下之人退而修本州黨有德義朝廷有公正浮華邪佞無所容厝今一國之士多者千數或流徙異邦或取給殊方面猶不識況盡其才力而中正知與不知其當品狀采譽於臺府納毀於流言任已則有不識之蔽聽受則有彼此之偏所知者以愛憎

奪其平所不知者以人事亂其度既無鄉老紀行之譽
又非朝廷考績之課遂使進官之人棄近求遠背本逐
末位以求成不由行立品不校功黨譽虛妄損政五也
凡所以立品設狀者求人才以理物也非虛飾名譽相
為好醜雖孝悌之行不施朝廷故門外之事以義斷恩
既以在官職有大小事有劇易各有功報此人才之實
效功分之所得也今則反之於限當報雖職之高還附
卑品無績於官而獲高叙是為抑功實而隆虛名也上

奪天朝考績之分下長浮華朋黨之士損政六也凡官
不同事人不同能得其能則成失其能則敗今品不狀
才能之所宜而以九等為例以品取人或非才能之所
長以狀取人則為本品之所限若狀得其實猶品狀相
妨繫繫選舉使不得精於才宜况今九品所疎則削其
長所親則飾其短徒結白論以為虛譽則品不料能百
揆何以得理萬機何以得修損政七也前九品詔書善
惡必書以為褒貶當時天下少有所忌今之九品所下

不彰其罪所上不列其善廢褒貶之義任愛憎之斷清濁同流以植其私故反違前品大其行勢以驅動衆人使必歸已進者無功以表勸退者無惡以成懲懲勸不明則風俗汙濁天下人焉得不解德行而銳人事損政八也由此論之選中正而非其人授權勢而無賞罰或缺中正而無禁檢故邪黨得肆枉濫從橫雖職名中正實為姦府事名九品而有八損或恨結於親親猜生於骨肉當身困於敵讐子孫離其殃咎斯乃歷世之患非

徒當今之害也是以時主觀時立法防姦消亂靡有常制故周因於殷有所損益至於中正九品上聖古賢皆所不為豈蔽於此事而有不周哉將以政化之宜無取於此也自魏立以來未見其得人之功而生讐薄之累毀風敗俗無益於化古今之失莫大於此愚臣以為宜罷中正除九品棄魏氏之弊法立一代之美制

並晉書杜氏

通典穀表云刺史初臨州大中正選州里才業高者兼主簿從事迎刺史若吏部選用猶下中正問人事所在

父祖位狀

劾劉肇奏

世說王戎為侍中南郡太守劉肇遺中箋布五端戎雖不受厚報其書及

毅劾戎以書

未達不坐

南郡太守劉肇以布五十疋雜物遺前豫州刺史王戎
請檻車徵付廷尉治罪除名終身

晉陽秋

孫尹

論劉毅為青州大中正表

司徒舉毅尚書以毅致仕不宜勞以碎務

陳留相樂安孫尹表論於是青州自二品

已上光祿勳石鑒等共奏毅遂為州都

禮凡卑者執勞尊者居逸是順叙之宜也司徒魏舒司

隸校尉嚴詢與毅年齒相近往者同為散騎常侍後分授外內之職資塗所經出處一致今詢管四十萬戶州兼董司百寮總攝機要舒所統殷廣兼執九品銓十六州論議主者不以為劇毅但以知一州便謂不宜累以碎事於毅太優詢舒太劣若以前聽致仕不宜復與遷授位者故光祿大夫鄭袤為司空是也夫知人則哲惟帝難之尚可復委以宰輔之任不可諮以人倫之論臣竊所未安昔鄭武公年過八十入為周司徒雖過懸車

之年必有可用毅前為司隸直法不撓當朝之臣多有
按劾諺曰受堯之誅不能稱堯直臣無黨古今所悉是
以汲黯死於淮陽董仲舒裁為諸侯之相而毅獨遭聖
明不離輦轂當世之士咸以為榮毅雖身偏有風疾而
志氣聰明一州品第不足勞其思慮毅疾惡之心小過
主者必疑其論議傷物故高其優禮令去事實此為机閣
毅使絕人倫之路也臣州茂德惟毅越毅不用則清談
倒錯矣 晉書

石鑒

字林伯樂陵厭次人
歷太尉封昌安縣侯

舉劉毅奏

謹案陳留相孫尹表及與臣等書如左臣州履境海岱
而叅風齊魯故人俗務本而世敦德讓今雖不充於舊
而遺訓猶存是以人倫歸行士識所守也前被司徒符
當叅舉州大中正僉以光祿大夫毅純孝至素著在鄉
閭忠允亮直竭於事上仕不為榮惟期盡節正身率道
崇公忘私行高義明出處同揆故能令義士宗其風景

州閭歸其清流雖年耆偏疾而神明克壯實臣州人士
所思準繫者矣誠以毅之明格能不言而信風之所動
清濁必偃以稱一州咸同之望故也竊以為禮賢尚德
教之大典王制奪與動為開塞而士之所歸人倫為大
臣等虛劣雖言廢於前今承尹書敢不列啓按尹所執
非惟惜名議於毅之身亦通陳朝宜奪與大準以為尹
言當否應蒙評議

晉書

繆應世附

石鑒碑

北堂書鈔

君為治書御史朝庭以公雅節不羣直方其道仍授準
繩之官頻居爪牙之任鷹跼虎視而庶僚風靡

王宮

北海人羽林左監

請謚劉毅疏

毅卒贈儀同三司宮上表武帝使八座議之多同奏寢不報

中詔以毅忠允匪躬贈班台司斯誠聖朝考績以毅著
勲之美事也臣謹按謚者行之迹而號者功之表今毅
功德並立而有號無謚於義不體臣竊以春秋之事求

之謚法主於行而不繼爵然漢魏相承爵非列侯則皆
沒而高行不加之謚至使三事之賢臣不如野戰之將
銘跡所殊臣願聖世舉春秋之遠制改劉爵之舊限使
夫功行之實不相掩替則莫不率賴若以革舊毀制非
所倉卒則毅之忠益雖不攻城略地論德進爵亦應
在例臣敢惟行甫請周之義謹牒毅功行如右

晉書

劉瞰

字長升毅子厓司隸加侍中
封朱虛縣公為石勒所殺

請免王渾奏

司徒王渾主簿劉輿獄辭連瞰將
收付廷尉渾不欲使府有過欲距

勅自舉與睪更相曲直渾遜位還
第睪時為侍御史奏渾聞者嘆美

謹按司徒王渾蒙國厚恩脩位鼎司不能上佐天子調和陰陽下遂萬物之宜使卿大夫各得其所敢因劉興距扞詔使私欲大府興長獄訟昔陳平不答漢文之問酈吉不問死人之變誠得宰相之體也既興刑獄怨懟而退舉動輕速無大臣之節請免渾官右長史楊邱亭侯劉肇便辟善柔苟於阿順請大鴻臚削爵土

申理惠羊皇后奏

成都王穎起兵奏廢后為庶人陳眎等伐成都復后位張

方入洛又廢后已奉惠帝幸長安留臺復后位已又廢之河間王顥以后屢為奸人所立矯詔賜死司隸校尉劉暉與尚書僕射荀藩河南尹周馥上奏后得免

奉被手詔伏讀惶悴臣案古今書籍亡國破家毀喪宗祊皆由犯衆違人之所致也陛下遷幸舊京廓然衆庶悠悠罔所依倚家有跛踵之心人想鑾輿之聲思望大德釋兵歸農而兵纏不解處處互起豈非善者不至人情猜隔故邪今上官已犯關稱兵焚燒宮省百姓誼駭宜鎮之以靜而大使卒至赫然執藥當詣金墉内外震

動謂非聖意羊庶人門戶殘破廢放空宮門禁峻密若
絕天地無緣得與姦人構亂衆無智愚皆謂不然刑書
猥至罪不值辜人心一憤易致興動夫殺一人而天下
喜悅者宗廟社稷之福也今殺一枯窮之人而令天下
傷慘臣懼凶豎承間妄生變故臣忝司京輦觀察衆心
實以深憂宜當含忍不勝所見謹密啓聞願陛下更深
與太宰參詳勿令遠近疑惑取謗天下

並晉書

華廙

字長駿平原高唐人觀陽伯表長子嗣封為公歷尚書令光祿大夫

為武帝遺詔

武帝病篤楊皇后奏帝以父駁輔政便召中書監華廙令何劭口宣

帝旨使作遺詔后對廙劭以呈帝
帝視而無言駁遂當寄託之重

昔伊望作佐勲垂不朽周霍拜命名冠往代侍中車騎
將軍行太子太保領前將軍楊駿經德履詰鑒識明遠
毘翼二宮忠肅茂著宜正位上台擬迹阿衡其以駿為
太尉太子太傅假節都督中外諸軍事侍中錄尚書領
前將軍如故置叅軍六人步兵三千人騎千人移止前
衛將軍珧故府若止宿殿中宜有翼衛其差左右衛三

部司馬各二十人殿中都尉司馬十人給駿令得持兵

仗出入

晉書

有司華廙襲封奏

廙為觀陽伯表長子荀勗先為子求廙女不許為恨

因勗令素敵貨賕事啟武帝廙為敵最親
遂免廙官削爵土不應襲封有司奏不從

太康初大赦
乃得襲附

廙所坐除名削爵一時之制廙為世子著在名簿不聽襲嗣此為刑罰再加諸侯犯法八議平處者褒功重爵也嫡統非犯終身棄罪廢之為重依律應聽襲封

武帝詔報

諸侯薨子踰年即位此古制也應即位而廢之爵命皆去矣何為罪罰再加且吾之責廩以肅貪穢本不論常法也諸侯不能將明此意乃更詭易禮律不顧憲度君命廢之而羣下復之此為上下正相反也

晉書

華嶠

字叔駿廩弟歷秘書監散騎常侍封樂鄉侯著有集

蠶禮奏

太康六年嶠為散騎常侍奏於是親蠶於西郊

先王之制天子諸侯親耕籍田千畝后夫人躬蠶桑宮

今陛下以聖明至仁修先王之緒皇后體資生之德合配乾之義而坤道未光蠡禮尚闕以為宜依古式備斯盛典

諫武帝表

太康末武帝頗親宴樂屬病小瘳矯表賀因微諫帝手詔報

伏惟聖體漸就平和上下同慶不覺抃舞臣等愚慙竊有微懷以為收功於所忽事乃無悔慮福於垂成祚乃日新唯願陛下深垂聖明遠思所忽之悔以成日新之福沖靜和氣養精神頤身於清簡之宇留心於虛曠

之域無厭世俗常戒以忽羣下之言則豐慶日延天下
幸甚

武帝手詔

輒自消息無所為慮

並晉書

報國子祭酒鄒湛書

湛字潤甫南陽新野人謂秘書監華嶠曰閹豮可佐

著作嶠

答書

此職開廩重勢貴多爭不暇求其才用

北堂書鈔傳不云書文選

注鄒湛為諸葛穆答晉王

命云雖云博納虛懷下開

謝秘書監表

伏見詔書以臣為秘書監加位常伯劉向父子世典史籍馬融博通三入東觀非臣庸賤所敢擬跡

華嶠集

華嶠集序

附

嶠作後漢書百卷張華等稱其良史之才足以繼跡遷固乃藏之秘府與三史並流

北堂書鈔

華軼

字彥夏表孫歷江州刺史元帝承制不從討誅之

置儒林祭酒教

軼永嘉中為江州下教

今大義類替禮典無宗朝廷滯議莫能攸正常以慨然
宜特立此官以宏其事軍諮祭酒杜夷棲情玄遠確然
絕俗才學精博道行優備其以為儒林祭酒 晉書

劉寔

字子真平原高唐人仕魏吏部郎叅文帝
相國軍事封循陽子入晉歷太尉進侯爵

崇讓論

實以魏末世多進趣廉遜
道闕乃著崇讓論以矯之

古之聖王之化天下所以貴讓者欲以出賢才息爭競
也夫人情莫不皆欲己之賢也故勸令讓賢以自明賢
也豈假讓不賢哉故讓道興賢能之人不求而自出矣

至公之舉自立矣百官之副亦豫具矣一官缺擇衆官所讓最多者而用之審才之道也在朝之士相讓於上草廬之人咸皆化之推賢讓能之風從此生矣為一國所讓則一國士也天下所共推則天下士也推讓之風行則賢與不肖灼然殊矣此道之行在上者無所用其心因成清議隨之而已故曰蕩蕩乎堯之為君莫之能名言天下自安矣不見堯所以化之故不能名也又曰舜禹之有天下而不與焉無為而化者其舜也歟賢人

相讓於朝大才之人恒在大官小人不爭於野天下無
事矣以賢才化無事至道興矣已仰其成復何與焉故
可以歌南風之詩彈五絃之琴也成此功者非有他崇
讓之所致耳孔子曰能以禮讓為國則不難也在朝之
人不務相讓久矣天下化之自魏代以來登進辟命之
士及在職之吏臨見受叙雖自辭不能終莫肯讓有勝
已者夫推讓之風忘爭競之心生孔子曰上興讓則下
不爭明讓不興下必爭也推讓之道興則賢能之人日

見推舉爭競之心生則賢能之人日見謗毀夫爭者之欲自先甚惡能者之先不能無毀也故孔墨不能免世之謗已況不及孔墨者乎議者僉然言世少高名之才朝廷不有大才之人可以為大官者山澤人小官吏亦復云朝廷之士雖有大官名德皆不及往時人也余以為此二言皆失之矣非時獨乏賢也時不貴讓一人有先衆之譽毀必隨之名不得成使之然也雖令稷契復存亦不復混全其名矣能否混雜優劣不分士無素定

之價官職有缺主選之吏不知所用案官次而舉之同才之人先用者非勢家之子則必為有勢者之所念也非能獨賢因其先用之資而復遷之無已遷之無已不勝其任之病發矣觀在官之人政績無聞自非勢家之子率多因資次而進也向令天下貴讓士必由於見讓而後名成名成而官乃得用之諸名行不立之人在官無政績之稱讓之者必矣官無因得而用之也所以見用不息者由讓道廢因資用人之有失久矣故自漢魏

以來時開大舉令衆官各舉所知唯才所任不限階次
如此者甚數矣其所舉必有當者不聞時有擢用不知
何誰最賢故也所舉必有不當而罪不加不知何誰最
不肖也所以不可得知由當時之人莫肯相推賢愚之
名不別令其如此舉者知在上者察不能審故敢漫舉
而進之或舉所賢因及所念一頓而至人數猥多各言
所舉者賢加之高狀相似如一難得而分矣叅錯相亂
真偽同貫更復由此而甚雖舉者不能盡忠之罪亦由

上開聽察之路濫令其爾也昔齊王好聽竽聲必令三百人合吹而後聽之廩以數人之俸南郭先生不知吹竽者也以三百人合吹可以容其不知因請為王吹竽虛食數人之俸嗣王覺而改之難彰先王之過乃下令曰吾之好聞竽聲有甚於先王欲一一列而聽之先生於此逃矣推賢之風不立濫舉之法不改則南郭先生之徒盈於朝矣才高守道之士日退馳走有勢之門日多矣雖國有典刑弗能禁矣夫讓道不興之弊非徒賢

人在下位不得時進也國之良臣荷重任者亦將以漸受罪退矣何以知其然也孔子以為顏氏之子不貳過耳明非聖人皆有過寵貴之地欲之者多矣惡賢能者塞其路其過而毀之者亦多矣夫謗毀之生非徒空設必因人之微過而甚之者也毀謗之言數聞在上者雖欲弗納不能不伏所聞因事之來而微察之也無以其驗至矣得其驗安得不理其罪若知而縱之主之威日衰令之不行自此始矣知而皆理之受罪退者稍多大

臣有不自固之心夫賢才不進貴臣日踈此有國者之深憂也詩曰受祿不讓至於已斯亡不讓之人憂亡不暇而望其益國朝不亦難乎竊以為改此俗甚易耳何以知之夫一時在官之人雖雜有冗猥之才其中賢明者亦多矣豈可謂皆不知讓賢為貴邪直以其時皆不讓習以成俗故遂不為耳人臣初除皆通表上聞名之謝章所由來尚矣原謝章之本意欲進賢能以謝國恩也昔舜以禹為司空禹拜稽首讓于稷契及咎繇使益

為虞官讓於朱虎熊羆使伯夷典三禮讓於夔龍唐虞之時衆官初除莫不皆讓也謝章之義蓋取於此書記之者欲以永世作則李世所用不賢不能讓賢虛謝見用之恩而已相承不變習俗之失也夫叙用之官得通章表者其讓賢推能乃通其不能有所讓徒費簡紙者皆絕不通人臣初除各思推賢能而讓之矣讓之文付主者掌之三司有缺擇三司所讓最多者而用之此為一公缺三公已豫選之矣且主選之吏不必任公而選

三公不如令三公自共選一公為詳也四征缺擇四征
所讓最多者而用之此為一征缺四征已豫選之矣必
詳於停缺而令主者選四征也尚書缺擇尚書所讓最
多者而用之此為八尚書共選一尚書詳於臨缺令主
者選八尚書也郡守缺擇衆郡所讓甚多者而用之詳
於任主者令選百郡守也夫以衆官百郡之讓與主者
共相比不可同歲而論也雖復令三府參舉官本不委
以舉選之任各不能以根其心也其所用心者裁之

不二三但令主者案官次而舉之不用精也賢愚皆讓百姓耳目盡為國耳目夫人情爭則欲毀已所不知讓則競推於勝已故世爭則毀譽交錯優劣不分難得而讓也時讓則賢智顯出能否之美歷歷相次不可得而亂也當是時也能退身修己者讓之者多矣雖欲守貧賤不可得也馳騫進趣而欲人見讓猶卻行而求前也夫如此愚智咸知進身求通非修之於已則無由矣游外求者於此相隨而歸矣浮聲虛論不禁而自息矣人

無所用其心任衆人之議而天下自化矣不言之化行
巍巍之美於此著矣讓可以致此豈可不務之哉春秋
傳曰范宣子之讓其下皆讓欒黶雖汰弗敢違也晉國
以平數世賴之上世之化也君子尚能而讓其下小人
力農以事其上下有禮讒慝遠黜由不爭也及其亂
也國家之弊恒必由之篤論了了如此在朝君子典選
大官能不以人廢言舉而行之各以讓賢舉能為先務
則羣才猥出能否殊別蓋世之功莫大於此

晉書 人
無所用其

心作
人人

諸王表

北堂
書鈔

郊廟諸王見在奉朝請宜兼三公

劉坦

尚書
左丞

宜聽劉寔辭位奏

懷帝初復授太尉年
老固辭不許坦上言

夫堂高級遠主尊相貴是以古之哲王莫不師其元臣
崇養老之教訓示四海使少長有禮七十致仕亦所以
優異舊德厲廉高之風太尉寔體清素之操執不渝之

潔懸車告老二十餘年浩然之志老而彌篤可謂國之
碩老邦之宗模臣聞老者不以筋力為禮寔年踰九十
命在日制遂自扶輿冒險而至展哀山陵致敬闕庭大
臣之節脩矣聖詔殷勤必使寔正位上台光飪鼎寶斷
章敦喻經涉二年而寔頻上露板辭旨懇誠臣以為古
之養老以不事為優不以吏之為重謂宜聽寔所守

晉書

殷襄

字元祚渤海府君之子見殷氏世傳藝文類聚載魏殷襄薦朱倫表又載晉殷襄誠子書

唐經籍志殷襄集二卷列魏鄭樵通志魏章武太守殷襄集二卷太平御覽又叙其事在晉當

魏人

入晉

薦朱倫表

蓋聞虞書非俊又無以光帝載西伯非髦士無以開王
業是故高世之主必廣登命之禮有為之君務通賢者
之路所以成大治也切見同郡朱倫字文信天真清亮
雅性忠篤純粹足以激清源美行足以廣風俗當仁不
讓見得思義疏達之才強記博聞飛辭抗論駱驛奇逸
誠當世之俊異一時之秀出也如得毗佐銓衡翼亮右

曹濟濟之觀足用華國

誠子書

夫道也者易尋而難窮易知而難行也故京房之徒考
步吉凶之變而不能自見其禍更為姚平所誡此道之
難知也省爾之才不及於房而吾之言過於平矣昔正
考父三命滋恭晏平仲久而敬之曾顏之徒有若無實
若虛也况爾析薪之智欲彈射世俗身為謗先怨禍並
集使吾懷朝父之憂為范武子所歎亦非汝之美也若

朝益暮習先人後已恂恂如也則吾聞音而識其曲食
旨而知其甘永終吾餘年矣復何恨哉古人有言思不

出其位爾其念之爾其念之

並藝文類聚

殷巨

字元大雲陽人有才器仕吳偏將軍入晉為
蒼梧太守見殷典通語隋經籍志交趾太守

殷巨集

二卷

奇布賦序

惟太康二年安南將軍廣州牧滕侯作鎮南方余時承
乏忝脩下僚俄而大秦國奉獻琛來經於州衆寶既麗

火布尤奇乃作賦

御覽

江偉

晉通事郎江偉集
六卷載隋經籍志

答賀蜡詩序

正元二年冬臘家君在陳郡余別在國舍不得集會弟
廣平作詩以貽余答之

襄邑令傅渾頌

君稟二儀之醇粹履元亨之貞和比德金玉而堅白不
磨自處戶庭而名稱家邦不出門庭而聲播諸華矣弱

冠而應式叙起家而君斯民其為政也同厲秋霜等惠
春仁刑不濫踈賞不僭親儀天地之簡易則大道之清
純是以其道易行其教易遵也凡我士民襁老携幼惴
惴而懷君之恩顒顒而戀君之德相與援衡軒而雨涕
若赤子於父母也明明君侯臨下有赫克隆有光惠我
咫尺于以具瞻有觀其宅乃冰其清乃玉其白風抗其
高雲垂其澤宛荆未清淮夷孔熾春日萋萋我車既脩
允允我君爰登其司微微襄魯有圯斯記君有遺愛民

有餘思敢揚斯頌垂之來志

並藝文類聚


素准

字孝尼陳郡扶樂人渙之子有偶才
泰始中為給事中見荀綽九州記

才性論

凡萬物生於天地之間有美有惡物何故美清氣之所
生也物何故惡濁氣之所施也夫金石絲竹中天地之
氣黼黻玄黃應五方之色君子以此得曲直者木之性
也曲者中矩鉤者中繩輪角之材也賢不肖者人之性
也賢者為師不肖者為資師資之材也然則性言其質

才名其用明矣



西晉文紀卷八